

U Drvaru suspendiran krajni rok od 4. jula

Visoki predstavnik, Carlos Westendorp, je danas donio Odluku kojom se u općini Drvar suspendira primjena člana 5. *Zakona o prestanku primjene Zakona o napuštenim stanovima* u Federaciji.

Član 5. se odnosi na vremenski period tokom kojeg mora biti podnesen zahtjev za povratak stanarskog prava na stanove u društvenom vlasništvu kako bi se spriječilo da stanarsko pravo bude trajno ukinuto. Ovaj rok u Federaciji ističe 4. jula.

Visoki predstavnik je izdao ovu Odluku kako bi zaštitio prava osoba koje su posjedovale stanove u društvenom vlasništvu u Drvaru, a koje nisu bile u mogućnosti da podnesu zahtjeve za povrat ovih stanova zbog neodgovarajućeg funkcioniranja općinskog stambenog ureda.

Dugi period vremena Ured za stambene poslove u Drvaru je bio u potpunosti nedostupan podnosiocima zahtjeva. Čak i kada je funkcionirao, mnogim podnosiocima zahtjeva nisu izdavane potvrde kojima se dokazuje da su oni podnijeli svoje zahtjeve na vrijeme, zbog čega bi mogli izgubiti svoja prava nakon isteka roka od 4. jula.

Odluka Visokog predstavnika ostaje na snazi sve dok Specijalni izaslanik Visokog predstavnika za Drvar ne potvrdi da je Ured za stambene poslove počeo funkcionirati na odgovarajući način.

Podnosioci zahtjeva neće izgubiti svoja prava na povrat stanova nakon isteka roka od 4. jula, već će im biti dozvoljeno da svoje zahtjeve podnesu nakon toga.

Visoki predstavnik je ovu Odluku donio koristeći se ovlaštenjima koje su mu dodijeljene Aneksom 10. Daytonskog mirovnog sporazuma i članom XI Zaključaka Konferencije Vijeća za implementaciju mira održane u Bonn-u u decembru 1997.

godine. Njegova Odluka stupa na snagu danas, i bit će objavljena u Službenim novinama Federacije.